



CELSISSIMO AC POTENTISSIMO
CAROLO-JUSTO DE BEAUVAU,
SANCTI IMPERII PRINCIPI,
HISPANIAE E PRIMA CLASSE MAGNATI,
REGIS ORDINUM EQUITI,
EXERCITUUM EJUS LEGATO GENERALI,
PRÆTORIÆ COHORTIS PRÆFECTO,
URBIUM BARODUCI
ET LUNEVILLÆ GUBERNATORI, &c. &c.
UNI E QUADRAGINTA VIRIS ACADEMICIS.

*Offert, dicat & consecrat in obsequii & grati animi pignus
MICHAEL NOEL, Regii Chirurg. Paris. Collegii
Candidatus.*

DE ABSCESSU ABDOMINIS ET EFFUSIONE AB EROSIONE VERMIUM.

T H E S E S ANATOMICO - CHIRURGICÆ.

I.

OMNES ferè morbos hominem opprimentes solers Chirurgiæ subleuat Genius. Circà illos qui corpus externè afficiunt, amicamque operantis Chirurgi manum desiderant, non tantùm versatur Ars salutaris; sed angustos hosce limites prætergrediens, morbis etiam internis audaci sæpiùs & felici operatione efficacem Medicinam præstat.

Intrà abdomen enasci vermes non rarum; medicamentis internis ut plurimùm cedunt: at horum virtutem eludunt quandoque, variasque affectiones procreant quæ salutarem Chirurgi medentis operam requirunt. Jam progeniti in intestinorum vel in ventriculi cavo, nutriuntur & crescunt vermes viscerum detrimento; horum parietes delibant, erodunt & perforant; hinc abscessus, humorum effusiones, fodicantis inimici transmigratio. Licèt aliis sint hi morbi rariores, quandoque existere sat est, cùm diris sæpè stipentur accidentibus, ut attento animo perscrutentur. Quò enim periculosius, cognituque difficilius malum minatur, eo ardentius de ipsius diagnosi & de curâ inquirendum. Jàm verò ut nostro p̄posito faciamus satis, partium in abdomine conten-

tarum expositionem anatomicam breviter delineare operæ pretium ducimus.

I I.

Partes abdominis, in continentes & contentas dividunt Anatomici. Illæ vel communes sunt, ut Cutis & Membrana adiposa; vel propriæ, ut Ossa, Musculi & Peritoneum. Musculorum quinque paria vulgò numerantur, nempe in uno quoque latere; Obliquus descendens, seu major; Obliquus ascendens seu minor, Transversus, Rectus & Pyramidalis. Priorum tendinibus implexis linea conficitur alba, in cujus medio Umbilicus. Musculis Transversis adhæret Peritoneum, tenuis membrana, totum interius abdomen & pleraque ejus viscera investiens.

Inter contentas, Omentum, Ventriculus, Intestina, Mesenterium; Hepar cum vesiculâ fellis; Lien, Vesica urinaria, apud mulieres Uterus, &c. recensentur. Ex hisce partibus, in ventriculi vel intestinorum cavo à vermibus præsertim appetuntur domicilia.

Ventriculus, amplum viscus, membranaceum, Hepar inter & Lienem sub Diaphragmate obliquè situm, utriculo luforio conformat; in ipso facies anterior & posterior, quæ, pro plenitudine ventriculi, in superiorem & inferiorem mutantur. Illius orificium duplex annotatur; sinistrum altius, sive Cardia; inferius dextrum, sive Pylorus, ubi valvula ventriculum claudit. Tunicis quatuor ille gaudet: à peritoneo prima; secunda musculosa, cujus fibrarum quasi inextricabilis est ordo; quædam enim circulariter disponuntur, aliæ inter utrumque orificium rectæ decurrunt, quædam deniquè propè orificium superius obliquè decussantur. Tertia densa, albicans, innumeris vasis sanguiferis perfusa, nervosa dicitur, quæ cum quartâ seu membranâ villosâ rugas interiùs efficit; hæc tenues meatus ubique patentes, totidem vasorum exhalantium vel resorbentium oscula præ villis exhibet, inter quos glandulæ minores annotantur. Ventriculus alimenta recipit, mutat, concoquit, levi pressione in minimas partes dividit, invicem miscet, ad digestionem disponit, versùsque intestina expellit, in quibus perficitur hæc actio.

Canalem longum, flexuosum, membranaceum à ventriculo ad

anum usque extensum efformant intestina, quæ septies homine longiora, mirabiles dant circumvolutiones, ope mesenterii, vertebris lumborum liberè connexas. Sex designantur intestina, quorum tria, Duodenum, Jejunum, & Ileum, tenuia; tria verò Cæcum, Colon & Rectum, crassa dicuntur. Conniventibus valvulis prætermiſſis, eadem ferè intestinorum ac ventriculi structura. Arteriæ & venæ mesaraicæ; nervi ab intercostalibus progeniti; vasa lactea sicut & limphatica, substantiam eorum perreptant. Intestina tenuia cibos recoquunt, secretionem chyli perficiunt, residuum digestionis versùs intestina crassa motu peristaltico propellunt, quæ dein collectas fæces suo tempore excludunt.

I I I.

Licèt cùm germine aut vermium ovis nascamur; licèt cùm fluido quem inspiramus aere in vasa thoracis irreant ova; licèt alimentis identificati vermes intùs sobolescant, parùm interest. In omnibus ferè corporis partibus generantur; sed in ventriculo & intestinis præsertim nascuntur lumbrici, qui pro diversâ specie, diversis nominibus designantur. Quidam, nempe Stronguli, oblongi necnon cylindrici tenuia vel crassa intestina sæpiùs vexant; Ascarides alii breves & cylindrici intestinum rectum pro sede præcipuâ habent. Tænia dein longissimus planusque tenuiorum intestinorum præsertim incola, varias intùs edit strages & pylorum quandòque dilacerat. Alios etiam alii addunt vermes nomine cucurbitanos, quos tæniæ disruptæ particulas esse breves fatentur, quosque idèò inter varias vermium species non admittendos censemus. Stronguli potissimùm malorum, de quibus modò dicturi sumus, series procreant.

Omne vermium genus, animal valdè simplex, cùm plurimas partes in cæteris ad vitam necessarias aut non habeat, aut minùs compositas habeat, constat utique canali longo-circulis transversis intersecto. In corpore mamillæ distinguuntur; hujus extremitates acutæ apparent: Cerebrum, cor, pulmones aut nulla, aut minùs conspicua; vasaque tantæ exiguitatis, ut nisi juvante microscopio sensibus desiderarentur. In ore tuba aculeata annotatur quâ per membranas intestinorum inferuntur, easque corrodunt & perforant.

Quandòque ex umbilico puerorum post diros cruciatus egrediuntur vermes, quos in hac parte peculiare voluerunt permulti, sed hos in intestinis progenitos post erosionem intestinorùm & tegumentorum foràs erumpere, observationes demonstrant (1). Forestus lumbricos quatuor majores, aditu sibi propè umbilicum factò ex abdomine mulieris vivæ erumpentes, non sine admiratione se vidisse refert (2). Effusionem alimentorum in abdomine, mortemque indè subsecutam, eroso à vermibus ventriculo, apud Hildanum narrat Crafftius (3). Testatur etiàm Paræus (4) ex hisce effusionibus ab erosionem subsequentibus plerosque ægrotantes de medio tolli.

Res verò meliùs quandoque succedere, observationes fequentes demonstrant.

Tumefacto ventre dudùm ægrotabat puella. Versùs umbilicum urget malum, oritur tumor fluctuans, sequitur mox suppuratio, & paulò post acerrimi doloris sensum strongulus spontè exit, morbique causam minuit, uti nuperrimè observavit Clar. Actùs Præses.

Mulier quæ longè antea ligone vi magnâ in abdomen impactò percussa fuerat, varioque tempore vermium per os aut anum ejectionibus obnoxia, acerbissimis, fixis & pungentibus præsertim in inguine dextro doloribus cruciabatur. Deindè tumor ab umbilico ad partem dolentem subnascitur: applicantur maturantia, & die tertiâ cutis livor imminens intentat gangrenam: tumor aperitur: magnâ puris subnigri & fœtentis copiâ per aperturam elapsâ, duodeni vermes novem uncii oblongi, quorum tres mortui, cæteri verò viventes, emigrant; quod quidam ægrotanti summo levamento fuit. Triduo post adhibitis intùs Anthelminticis, rursùm per ulcus, vermis ejusdem longitudinis egressus est. Amissâ licèt substantiâ, nihil de intestinorum functionibus detractum, brevique languescens è morbo convaleuit.

(1) Vide Andri, *Traité de la Génération des Vers*, pag. 112, Art. 2, Chap. 4.

(2) Libro VII. Obs. 35.

(3) Crafftius. Obs. Chirurg. Centur. 2. Obs. 71.

(4) Liv. 20. Chap. 4.

Paucis abhinc annis in cadavere viri per glandis plumbeæ emissionem è catapultâ enecti, propè quadraginta vermes qui intestinorum latera exederant & inter mesenterii membranas serpsierant, comperimus. Dùm ille vitâ fruebatur, umbilici regionem acerbissimis doloribus cruciari alto de corde gemuerat.

Paulò post in praxi duo sequentia observavimus. Puella octavum-decimum annum agens, in nosocomio Nanceii decumbens, postquàm sævos in abdomine dolores experta fuisset, sex vermibus oblongis ex ulcere umbilici, cum materiâ subflavâ tandem rejectis, valetudinem integram recuperavit.

Adolescens ejusdem ferè ætatis vix è febre verminosâ necnon putri quæ tùm in Lotharingiâ vigeat epidemicè, evaserat, cum jàm doloribus in abdomine sævis laboravit, membrorum convulsio, stercoralis etiàm materiei effusio subsecutæ sunt. Dein prominente extûs tumore, cùm in aliorum abdomine eâdem epidemiâ extinctorum, verminosas viderimus effusiones, eò libentiori animo hîc incidere statuimus. Abdomine aperto, curationeque ad morbum accommodatâ æger sanus valuit.

I V.

Ex observatis patet, à lumbricis erodentibus ventriculum aut intestina, oriri abscessus & effusiones, quorum curatio eò difficilior, quòd malum occultè serpit & ingravescit absque certis symptomatibus; attamen ut tutò curari possit, necesse est ut indubitata hujusce instituaturs diagnosi. Equidem color faciei pallidus, oculorum scintillatio, narium pruritus, dentium stridor, halitus difficilis, salivæ profluvium, anxietas præcordiorum, ventriculi dolor, nausea, singultus, vomitus, horror, appetitus quandòque depravatus, vorax quandòque, inani ventre colicus dolor qui sæpiùs alimentis repleto placatur, fæces indigestæ & albicantes, in febre, animi defectio, vertigo, convulsio, stupor inter signa vermium existentiam indicantia annumerantur. Hanc demonstrabunt vermium ejectiones per os aut anum. His si succedat dolor constans & perpetuus in locis pungens fixis, qui longè ante tumorem deprehenditur, dùm è contrâ in aliis tumoribus præsertim inflammatoriis dolorem tu-

mefactio præcedit, vel saltem comitatur : tunc irritatio , inflammatio & erosio pertimescendæ. Partibus abscessis aut erosis, intrâ abdomen disseminantur vermes ; materiæ intestinales alteriùsve generis cùm vermibus per abdomen effunduntur, & effusæ, lethalem committunt gangrenam, quam mox indicant anghela sitis, febris ardens cui modò succedunt pulsus debilis, parvus, sudores frigidi , totiusque abdominis distensio. Cæterùm plus minùsve læditur intestinorum substantia pro quantitate & specie vermium : undè concludendum est strongulos ascaridibus cucurbitanis-que esse exitiosiores. Malum hoc à ramicibus vix posse distingui frustrâ objicietur ; quàm inter se discrepent , evincit horum comparatâ inter se natura.

V.

Cognitâ lumbricorum existentia, pro variis symptomatibus, & mali gradu, varia opponenda sunt auxilia. Alia causis obstant in vermes artis tela vertendo ; alia secundariis affectibus medelam afferunt. Illa intùs adhibentur : talia sunt mercurialia, acida, amara, oleosa, necnon aliæ anthelminticorum species ; quibus cathartica aut emetica feliciter quandoque adduntur. Alimenta etiam congrua cautè præscribenda. Vermibus immediatè vim inferunt hæc remedia ritè adhibita, hos enecant, foràs expellunt, sicque mala ab eorum præsentia & actione subsecutura præcavent. Præter hæc remedia, externè applicari possunt fel bovis, oleum absinthii, rutæ, pulvis aloes, cumini, centaurii, nicotiana, colocynthis. Si his non cedant vermes, malique labem ulteriùs propagent ; si inflammatio abscessusque extùs appareant : tunc tumor maturantibus operiendus, ut perceptâ fluctuatione hunc incidat Chirurgus. Sic erosio & effusio imminens vitantur vel saltem minuuntur, dùm aperto claustrò foràs prodeunt vermes, evanescitque strages quam vermium, ichoris, stercorisve diuturna stasis brevi esset paratura. Absint hîc caustica ; scalpellum præ cæteris adhibeatur. Apertos hoc modò tumores, unguento digerente simplici aut pro re natâ, cùm antiputridis, balsamicis, amarisve accommodato, injectionibusque idoneis curare licebit. Evacuatis vermibus, liquoribusque effusis, feliciter ut plurimùm brevi-que sanatur erosio. Hoc probant exempla antea memorata, plurimæque observationes in Auctoribus consignatæ. Remediis ergò internis primùm

debellandi vermes ; sin verò infestum ens nec moriatur , nec à corpore expellatur , illi damnum affert : undè omni aliâ curationis ope invalidâ , si adsit tumor , audaciter manum ferro instruat Chirurgus , & tumor incidatur arte.

HAS THESES , Deo juvante , & præside M. TUSSANO BORDENAVE, Artium & Chirurgiæ Magistro, Scholarum Professore Regio , Regiæ Chirurgiæ Academiæ Pro-Directore, Collegii antiquo Præposito, è Regiâ Scientiarum Academiâ, Academiarum Rhotomagensis & Florentinæ Socio ; tueri conabitur MICHAEL NOEL, Bayoneus-Tullensis , Artium Liberalium & Chirurgiæ Magister Mussipontanus , Theseos Auctor.

P A R I S I I S ,

IN REGIIS CHIRURGORUM SCHOLIS,

*Die Sabbati tertiâ Septembris, Anno salutis 1774,
à sesqui-secundâ post meridiem ad septimam.*

PRO ACTU PUBLICO

ET

M A G I S T E R I I L A U R E A.

Typis MICHAELIS LAMBERT, Regii Chirurgiæ Collegii
Typographi, viâ Cithareâ 1774.